





今文選卷之三 表

新城王士禛阮亭

如臯冒禾書穀梁

鑒定

宜興陳維崧其年同撰

如臯冒 襄巢民

如臯冒丹書青若

擬禮臣恭請臯太子出閣講學表

青浦

陳子龍

臥子

伏以心為王極文昌昭東壁之輝日有常明離  
景煥西瑤之彩受圖發祥於主噐雛鳳潛龍稽  
古豫贊於元良鏗金戛玉既生帝王之冢而為



才子必親賢哲之士以追聖人國本宜先祖訓  
尤烈臣等誠惶誠恐稽首頓首上言竊惟國之  
上嗣義號儲君大禮著世子之篇春秋申嫡家  
之訓自茲以往厥有貞回推所繇來皆原教諭  
繼黃熊之遐祀惟賴啓賢延赤爵之窮祥咸稱  
誦聖越稽古典莫備周官襁褓之中不離保傅  
之手禮樂之器習于岐嶷之時環甲守宮皆端  
人正士授几進膳必說禮稱詩鮑魚嚴非正之  
防雜絲有不衷之戒月朝左閣知爲孝德之長

日到寢門仍稟禮經之制故能養成聖德發輝  
圭璧之華雅擅文章歌舞麟龍之望自舊章道  
遠善翼無聞斬剗教于郎中亾秦之禍遂速法  
律傳于家令太宗之業已衰金椎遂亾于姒代  
土梗徒悲於晉年廣廡高軒通異端之賓客豹  
姿鳳德執賤役而屠酤是在墜波用符凶運外  
此以往猶可言焉若乃洛濱神仙之姿河曲文  
華之譽東田起苑徒生控鶴之妖西園讌賓僅  
擅雕龍之技王筠到洽風雲舒卷于樂賢潘岳



陸機輕俊翩翩于元圃答羣臣之箋啓多藝苑  
之微言窮七閣之縹緗出華林之奧錄雖傳通  
萬禩學貫九流自統修辭何關治道非麟趾之  
明義燕翼之淵謀也茲蓋伏遇皇帝陛下五緯  
調文三綱闡契學窮墳素拜圖姑射之陽義洞  
儒玄訪道崆峒之上石渠秘錄詞章直逼於宣  
宗錦水名箋書法可繩夫神祖惟文筆擅於數  
世而道統傳於一家况啓出帝妃早受玄狐之  
籙發生天妹當膺赤鳥之祥惟神誕神以聖繼

聖豈特漢家七制爾雅溫文曹祖三朝各嫻詞  
賦而已哉恭惟皇太子玉裕澄姿金昭茂質東  
朝早建宿慧流聲西面承宸少成含譽廷尉辨  
獄少茂陵之六年師曠審音餘子晉之二歲雖  
稟生天縱不藉詩書而蒙養聖功當親孝彥乘  
年德之方富如日初升乃道術之宜知似泉學  
海故敢爰稽古典明獻舊文上厯聖懷伏俞臣  
請開承華之省進彼儒臣闢玄圃之園召茲端  
士旦前佚後北宮備拂弼之儀冬羽春戈東序



全文武之業香浮銅鶴揚虎幄之蘭芬書壓銀  
麟展魚箋之竹素卷從天祿青藜分照於秋坊  
視撤鴛鴦班管飛英於春禁窮經疏廣賓從未  
祖之期稽古桓榮金紫方輝之日東華名士稷  
下淹儒莫不望九旗以峩峩趨三箱而肅肅先  
明小學天家應對之儀繼講尚書帝訓君臣之  
典或稱春秋之義勸誠其心勿讀申韓之書濫  
觴其志臨編淑問似棗據之對文終因事納規  
如那時之非厨宰從容燕坐指祖業之艱難反

覆抗言陳民生之利弊用以切磨粹質涵靜神  
姿使在冲齡同符上聖如離輪始照登若木而  
迎輝似寶玉方含人荆山而剖璞必能使重光  
累葉明兩揚聲臣等未嘗學禮徒知視寢之篇  
豈曰聞詩但咏卷阿之雅任惟惇典慚漢相之  
舊儀官帶官寮愧家臣之秋實仲宣崑壁無才  
侍讌于芙蓉孝綽剛條何貌聯光於圖畫然微

愛思鳳曆有道之長必廣導聰明在龍德  
合之日用是虔請綴以陳辭伏願儀宸早開



隨盛念泰陵堯舜之主六歲而大臣見於  
忠宣德風雅之朝十二而榮國等爲侍講  
如高皇帝儲君昭鑒之錄特賜青宮若文皇帝  
聖學心法之書早貽鶴禁史官方正之士必通  
博若宋濂內庭馴謹之流須溫雅如覃吉則百  
千萬億德盛於九皇六五四三祚長于二代矣

擬上親征朝鮮大捷國王率其臣民歸降

羣臣賀表

太倉

吳偉業

駿公

伏以帝德洪開布湛恩于寓縣皇圖廣運張捷  
伐于敷天漸被訖海隅之出日底定四方總銜  
約荒服以同風平章百姓天人胥慶遐邇咸休  
臣等誠懼誠怖稽首頓首竊惟黃帝戰于涿鹿  
先討不庭大禹會在塗山首誅後至徠遠必修  
文德舞干羽者七旬定亂須用武功整鈎援于  
三駕維茲朝鮮之僻壤實爲箕子之舊封土田



附庸分野疆于周索詩書風俗本支起自湯孫  
藉商王有道之長爲君子不灰之國自衛滿居  
秦空地虎踞真蕃右渠誘漢亡人賜張沮水荀  
璣下盧龍之甲揚僕浮渤海之船在元狩之三  
年置樂浪者四郡雖稱役屬尚類羈縻新室以  
易印而開兵慕容則分疆而爭長泊乎大業遂  
擾東陲疲敝師徒繹騷征討莫除癰疥徒潰腹  
心繼以貞觀之真人佐之英公之宿將攻城不  
拔振旅而歸卽賞仁貴之先登終慨魏徵之心

諫此固恃險勿賓阻強未服屈強于山海之間  
道逃在沃沮之內者也茲蓋伏遇皇帝陛下允  
文允武乃聖乃神篤生濬哲虹流黃道之垣誕  
毓禎符龍起紫濛之野教讓典仁敦睦施乎九  
族制禮作樂風化浹于萬方祇世難之未平豈  
軍行之得已仁者無敵師必有名蠢爾蠻邦藐  
茲小朕念我國家新造之日正值疆場多故之  
秋糾率長戈侵牟近境幸喜鴉鵲關之戰大破  
鸛鷺陣之軍若便乘勝窮追因糧築壘何難長



驅平壤直擣王京迺猶狗彼行人賜之手詔修  
我睦鄰之誼寬其事大之誠蓋孟津八百之朝  
不遺微濮葵丘九合之會忍擯江黃庶其子孫  
守茲盟好孰意矯虔不順狙詐多虞跳梁百濟  
之區僭越夫餘之長鰲身日黑漫阻洪濤魚眼  
波紅輒修戰艦徒甘言以縻我難革面以相從  
用是赫然加諸蕞爾躬率中黃之士親占太白  
之符鼓震十三山咸開鞠旅營連八百里誰逆  
顏行帳下拔大食之刀鏤文龍雀軍前策澀注  
之產汗血驂騶嗟哉合市之人徒享開城之樂  
鳥鳴則散魚爛而亡賴輓懸車肯信位宮走免  
黃岩束馬寧容依慮速誅毋丘儉沸流之勝方  
之蔑如蘇定方瀉水之功遠過之矣於是馬韓  
喪膽辰國驚魂力盡而蓋蘇乞降勢窮則高元  
束手大侮薩反接于戲下莫離支稽顙于轅門  
繫頸先馬自請釘灰坦腹牽羊甘投鼎鑊我皇  
神武不殺寬大有容退舍而許之平解縛而赦  
其罪方提黃鉞遽令收軍勿剪朱蒙俾無廢祀



順利之城八門不驚鷄犬帶方之邑萬戶爭送  
壺漿洗兵馬普述之津爾今歸命刻日靡九都  
之石予實親征龍笙狼筆咸成內府之珍屈紉  
折巾俱陪上都之宴慕華樓賜舖合樂來賓院  
解甲休戈豈僅紙呈側理修降表于同文扇獻  
招涼布王風于下國而已哉伏願皇上王猷允  
塞聖德日新計威信已震乎三韓仗神靈早通  
乎八道新羅送贄仰憑廟社之靈薩水論功退  
念武臣之力下勾驪羈絏而稱臣僕右碣石斥  
患不服矣

候以備封疆行見四方削平萬里清溢如雷如  
霆如江如漢王于興師自西自東自南自北無



擬河工告成廷臣賀表

蘇州

錢中諧

宮啓

伏以德水朝宗千乘繞金堤之固陽侯效順二  
門安砥柱之瀾繫沉璧之無煩不藉白狐玄貉  
肆穿漕之可繼欣看錦纜牙檣非皇靈克暢于  
馮夷寧水府自由其故道神魚猶舞陽鳥爲懽  
臣等誠懽誠忭稽首頓首上言竊惟鼇足奠極  
以來巨掌擎神州之勢龍馬負圖而後洪河接  
天漢之流繞紫極以迴環拱皇輿而若帶源從  
萬里實居四瀆之尊波蕩九州自灌百川之水



土膏藉其潤澤資貢賴以梯航然而水德雖平  
經風卽險河流善決振古爲憂自蔥山鹽澤之  
已遙而王屋孟門之逾壯驚濤拍日倒銀嶺之  
千層濁浪浮天落金城之百丈故桑土書于夏  
紀十有三載乃同宣房築于茂陵二十餘年而  
定渠開六輔則荷擔成雲堰號千金則送徒彌  
歲水衡之錢多費淇園之竹爲空遂使鱗屋龍  
堂滅沒銅人之髻金烏犀柅飄颻貝闕之祠三  
策徒煩二渠誰恃蓋由汴堤垂柳未徵水德之

靈長以至津吏填薪空遣尋源之博望元光之  
災屢告太和之祭何年未有驅策玄夷澄清白  
馬狂瀾自息無勞伐鼓之聲頽洞還安忽覩浮  
槎之便如今日者也茲蓋伏遇皇帝陛下瑞應  
黃星符開黑水關崑崙而使西豎鞭石成橋揮  
渤澥而令東流鑄銅作柱神奉水心之劍國竊  
地角之圖自應海若無波積羊盡化何意天吳  
未靜鯨甲還驚猥爾荆隆不無蕩析楓宸爲之  
側席瓠子或以興歌試望成臯鳧渚與鴻溝未



辨每憂棗野櫻柎同杞梓俱流烏鵲填波恐摧  
六翮黃熊入澤將費九年里幾化于空桑人且  
虞其捧土左慈禁水竟不能靈陳協開渠殆難  
爲巧夫何沙洲之乍漲忽焉激浦之平分樹裏  
青牛依然無恙天邊赤甲復爾休明五渠緩激  
箭之流千丈見遊鱗之戲青龍桂楫還謳越女  
之風彩鷁牙盤更展吳江之技呂梁被髮莫痛  
于筮篋魚服乘潮無憂于魴鱖乃使城危獸角  
三版猶存地近蛟宮七軍不沒孟諸之麋可異

流萊之堰斯安誠屬神功始由天瑞臣等貸九  
枝之潤無力廻瀾占千載之清有心獻序鐵鵞  
莫策竹杖何施孰意頽波頓成安陸昔者成灰  
未盡碑難繼于李尤今者厲崇已消功更奇于  
延世輕水自合知帝子之靈暴漲潛平長忠臣  
之氣是可賀也寧不休哉伏願澤沛投醪勳成  
刻玉洗天河之兵甲定鼎千秋息海島之風濤  
榮光四塞帝星懸而不動地維亘以長寧則水  
調清歌都尉上桃花之米噐車佳瑞甘泉流竹



葉之杯矣

擬上納詞臣言詔毀三朝要典群臣謝表

青浦陳子龍 卧子

伏以奠安四極秉正議而履昌期昂耀九光闢  
邪說以彰大孝自是非旣溷海內憤鬱者二年  
而忠佞攸分聖人澄清於一日當昌言之會周  
道廓如焚亂人之書橫流永定三綱未泯理不  
常回九廟式靈賴于斯舉竊惟人君爲四海之  
主首辨者忠邪國史昭萬世之公難撓者善惡  
自睡淵杳杳遺赤水之明珠而止棘營營點青



蠅於良璧時方棄德天或富滌明夷有未蝕之  
憂南山與不弔之嘆嘗聞魑魅妄襲冠裳豈有  
狐狸遂操簪筆是以靜言之族不與謗而斥夔  
夷華辨之夫罔著書以誣游夏漢鈞二部清議  
之口不緘唐戮五王格天之功難掩若乃平陵  
起義巨君作誥者一篇淮南用師承祚書叛者  
二族惟一時之可飾豈千秋之遂聳以至王珪  
兩朝之書非寇準而稱丁謂蔡京哲宗之錄祖  
安石以詆宣仁不畏鬼神安知名教何意聖代

之御物而有穢史之惑人蓋鶴禁未開宮中分  
枯苑之迹而椒風方熾姦人生睥睨之心以至  
馮玉綴衣攀鼎湖而政酷遂有雀釵驪馬坐昭  
陽而不辭叩紫闕以力爭執掖庭而問狀臣義  
應爾國勢以安自元惡之借神當先朝之末命  
爾時右袒之輩多馳節甫之門屬有貳心之臣  
咸拜聖嬈之座北門秘獄白馬堙流東觀掌書  
青藜分火致使辛陽才子更爲檮杌之名全步  
險情翻稱鴻鵠之翼寃同黨籍元祐之賢旣登



罪等天樞武周之符速毀幸涇渭之終辨仰日月之常明茲蓋伏遇皇帝陛下運應玄期德同紀奮茲九翼自藩服而御天駕彼三龍握乾而宰世大風已弋無用軒弧罔爾旣圖方知禹鼎念慶陵主鬯之日實履危疑丁克璫竊國之時力爲掩覆承華寂寂專諸之劍幾成玄圃茫茫滄海之樵一奮彼根株有在宮庭之隱難窮而處置太輕儲兩之身何賤且也昔年妖帖幾掘兩宮之門何以今日凶謀便無十日之索

輕重在手觀望可知長源瓜臺之詩乃成罪案伯言武昌之表反屬厲階此億姓所以拊膺百靈爲之憤嘆者也至於皇考二十年黃離毓德四海傾心三十日紫極騰輝萬幾就理日當桑野忽龍馭之上升彗掃勾陳憑鸞軒而莫及雖無玉女傳聞天姥之遊豈有神方遺恨茂陵之樹漢高不服藥乃可罵醫者而賜黃金趙盾不弒君豈遂執董狐而焚青史此而可忍何所不爲至於七緯初淪不洒蒼梧之淚三星獨耀翻



思金紐之祥內挾龍顏瑤齋不啓外臨鳳幄沙  
麓幾與不賴排闥執義之夫豈有退避之日當  
時遺簪剗珥之論本爲姑息之心何意文帝代  
來更厭清宮之將豈聞治平親政遂憎撤簾之  
臣此因大盜秉衡方變蒼而爲白便使群邪執  
簡本欲蓋而彌彰淳于受許氏之金武安通淮  
南之款結外戚而傾國本翻稱調護之勲奉社  
稷以事闖奴復干方冊之典楊雄劇秦之服日  
作此一書安仁草勅之餘功更成數卷人心已

亂將等龍蛇每事矯誣何堪朱墨彼魏收死骨  
姑免剖斲之刑而曾布謗書可無水火之界惟  
我皇上乾清侍立之日親見官府危疑及乎信  
邸在潛之時深恨鯨鯢作孽採諸直道十行之  
玉札時頒削此滌文累朝之金匱永靖臣等術  
慚調劑道愧廓清昔知王氏詖辭禍胎紹述近  
恨焦芳曲筆力詆高賢早屬望於元良人日東  
朝私黨後誅鋤於凶逆自疑西市餘魂當國家  
繼統之間曷敢貪天功爲已力屬賊臣竊鼎之



日不能奉神器以授人幸逢攀鳳而駕車再從  
辰放快覩戮夔而冒鼓復履文昌此皆聖主任  
掃除之勞而使臣子受蕩平之福伏願除惡務  
盡去邪弗疑須知柳市之旁尚有運謀之客弗  
使桂宮之內復流異見之言狐簡雖焚可無上  
指天而下劃地鳩眼難化恐其南走越而北走  
胡仰懷楠而興哀益見奸回之不赦法春秋而  
出治豈憂讒賊之難知行見瑞表滎河帝貽延  
喜之玉卮成丹浦神避軒轅之臺矣

擬詔復建文紀號廷臣謝表

青浦 陳子龍 附于

伏以聖篤懿親隆號備一朝之典天懷大度紀  
年昭萬世之公同爲覆鳥之宗入繼中而不返  
共是斷蛇之裔俟代邱而更昌蓋帝德無私知  
廢典皆繇於天命而史書布信以歲月必繫於  
王朝錫類之仁久宏於烈祖正名之義有待於  
文孫聿追孝思寧維達識臣等誠惶誠恐稽首  
頓首上言竊惟披圖戴玉自然神器所歸依相



居巢亦有人君之號曾登鳳辰之上曆數在躬  
雖遇龍興之期名稱不改昭華應授固已刻璧  
而沉河龜鼎旣遷猶且析圭而建社燕祭臨淄  
之廟周崇景亳之封雖在勝國仇方有此隆恩  
懋典是惟異姓何況同枝虞代放勳亦愛終於  
文祖堯承帝摯本繼統於高辛均爲得姓之人  
寧知當璧而貴是以霸陵始至所誅異姓之兒  
白水中興不撤西京之祀昭烈待季王之禮尚  
號通人榮武命子恪之言真爲達者自皇風邈

塞末世伎猜一失金椎惡便同於桀紂苟辭玉  
曆祚必等於堅敖宋室洪枝遇榮期而盡剪蕭  
家龍子飽景栖之一嚮或一姓相承而法同汚  
屋或數年履業而廢極編氓况乎漢武建元人  
主因之而立號軒轅作曆史官依序而紀年不  
問德之昏明惟論祚之修短故雖子業無道不  
革大明之稱假令昌邑踰年豈襲元年之日若  
我皇明之彪駮仰惟高帝之鴻恢泛彭蠡而戮  
蚩尤尚封後裔跨朔野而驅獫狁特存史書見



聖人大公之心爲王者盛德之事何變生於再  
世而典缺於累朝聖必反經事如有待茲蓋伏  
遇皇帝陛下體符太乙德並三光受蘭葉於翠  
媯之川神靈爲治得玉璜於磻溪之側肅又皆  
臣統萬之城已維疏屬樂浪之郡方戮支祈憑  
文物而撫神圖歆然不足考典章而思天造撫  
焉動懷謂建文君者太祖之元孫文皇之猶子  
志存儒雅性本仁柔薄稅蠲租時下漢初之詔  
更名定制頗好用周官之書天下以爲太平朝廷  
亦無失德惟是資非英器外急威強輕與儒生  
內斷幾事屬名藩之鎮撫帝制國中又諸父之  
尊嚴勢侔京室而諸臣徒有馮敬之悍曾無賈  
誼之謀但聞尊主之權如身使臂不識維城之  
義自葉流根晁錯之計一行灌均之彈日急手  
操芟刃試此醜髡身自艸茅處人骨肉漢使者  
來驗玄冕忽成赭衣妄男子上書朱耶鞠爲茂  
草披玉衣而焚內殿禍等璇宮乘牛車而適蠻  
鄉愁同蜀道舉宗環視在天愴懷此皆群下効



吠堯之忠而使聖人假乘龍之便燕山一旅電  
掃星流河北諸州颺飛籜捲擁三衛之衆狼麤  
晨馳破九門之軍龍驤宵遁白旗黃鉞渡濁河  
而濟師赤雀蒼鷹臨大江而飲馬然猶大明宮  
裏戎服談玄華林苑中佩刀講義識成燕子竟  
比臨平之函議割鴻溝不救景陽之井遂使牙  
檣飛渡維舟朱雀之航金門自開繫馬蒼龍之  
闕爰登大庭之庫一望咸陽之宮玉女窻扉無  
明珠而壓勝仙人觀閣覩神劍之橫飛空聚茂  
陵之書文武道盡竟等吳宮之燬冥祿無靈憐  
此龍章付丹丘之一炬或云魚服訪崆峒而不  
歸惟我文皇帝備法駕而奉孝園執玄珪而謁  
高廟白茅掃地紫葢清宮哭遺尸於煨燼之餘  
葬故君以璵璠之禮已而李官煨煉始成奸勝  
之懸令甲更新遂有革除之號亦新朝之希旨  
豈大聖之本心用懲一時本非敵國仰惟睿訓  
有練子寧可用之言以至英皇釋建庶人永錮  
之罪蓋議親則子圉爲晉文之侄議貴則盤庚



猶陽甲之臣以德則儒術爲宗而非有冠狗弄  
莠之醜以罪則當門是剪而非關賜醢加劍之  
兇撫事論情援今証古爲謀失策誤聽家令之  
小忠自極兵威猶有湘東之善語周公不利孺  
子難免成王之疑太甲顛覆典刑惜無阿衡之  
佐且也存其帝位不行前代追廢之儀何以革  
其紀元豈成聖朝信史之義本殊踣跋之末常  
沿大統之名若比流莠之君尚建共和之號不  
有廢也其何以興祀已忽諸更將誰忌苟非聖  
明宏量坦然堯舜之心豈有廢德淪胥復數皇  
王之曆臣等史慚直筆禮愧專家嘆朱張之鷹  
揚則風雲動色思方黃之雉介則日月爭光本  
是神孫直伊邠之鍾慶常聞遺老痛蒼梧之不  
還幸當不諱之朝見此度外之事伏願經綸順  
理道德爲師合萬國之歡心奉承宗廟親九族  
以惇叙肆授几筵錫賚頑民卽移忠于來禩永  
思聖祖本大孝于天經行見甘露白鳥來彰傳  
愛之瑞亦且金芝華木常昭景命之符矣



擬詔蠲天下逋稅廷臣謝表

華亭

李

雯

舒章

伏以瓊霄墜露頰魚咸沐乎天波鳳律吹溫黃  
鳥懷音於春谷香披黃紙九天之雲下垂氣轉  
璇維五穀之星皆實反側何益而自作鳴鳴恩  
澤有加而寧同挺鹿含生知慶有口載歌臣等  
誠惶誠恐稽首頓首竊惟貢賦出於樂輸譬以  
子而養父徵求量於民力無有張而不弛繇禹  
貢以至於周禮無過十一之征自救患以及於



卹灾必有蠲租之令大半不足秦爲突獮三十  
時寬漢矜黔首降是而國謀日拙誰恤魏文之  
裘民呼不聞相驅顏闔之馬白鹿黃金巧辭加  
賦水衡少府豈曰神輸詔令所及或徼鳳凰神  
雀之優恩貸常偏不過井泉泰山之下輸獸藁  
於上林奚辭薪桂利蒲魚於豐澤併入舟蛟鱗  
閣何人搜丹青於絕巘羽儀粗備窮孔翠於層  
雲箭帖玳瑁豈皆慎肅之輸刀寢蛟皮寧爲鯢  
海之獻脫隋代之鶴毛人傷而物苦征坊州之  
杜若物是而地非捍撥鏤牙難違皇甫之詔立  
鷲天馬誰上衛公之書此皆化百姓之膏髓變  
作金錢驅下吏之嚴符以爲非稅至於輶車馬  
息弘羊所不出輸贖義錢虞詡所深非晉室渡  
江乃有契券之稅齊武作厲更納陂塘之租間  
架除陌致奉天之蒙塵版帳月春速臨安之竄  
海方其圍桑品屋吏方怒而君不知及乎鳥散  
魚驚上欲蠲而下不應四海皆困曾無痛惜之  
心一夫大呼遂有飛揚之勢雖欲總山海之饒



以持衡庫運齒角之利以制萌生又焉可得哉  
茲蓋伏遇皇帝陛下堯階不飾舜甑無羶蕭火  
南宮合盛氣於京版瑤軒東藉彰孝理於青壇  
魚龍曼衍之戲久廢深宮投珠抵璧之心遠乎  
寰海豈有一事傷民乃至中原多盜觀其羊怯  
狼貪非有張燕之剽勁塵飛蟻聚僅若廩君之  
餘魂而至於戟斷寢門劍磨陵石喋血淮穎躍  
馬潼關者非天子之威命頓小醜而不行乃下  
吏之誅求驅窮民而爲寇驚魂未息負斗粟而  
輒見鞭笞仰屋方愁逋一錢而又蒙貫索此皆  
者朝夕爲謀無心蓄旨被兵者僵尸屬路盡飽  
狐祥然而援師所過屏屨是資隣邑相聞城隍  
爲飾百孔千條一科十率兼以一歲所出乃供  
十年之求一錢所入復費數倍之用猛火屢燒  
漏卮難繼是以吹煙纔屬至此卿雲糠核暫充  
有同海棗民生不辰豈敢歸怨於聖主而帝曰  
朕罪乃遂均恩於萬方凡此逋稅之求徒飽奸  
人之腹終無益於國計如墾石田少有貸於小



民卽沾膏露收鴻鴈之心固使梟獍無黨祛鼠  
雀之耗以待倉廩漸盈苟其信及豚魚豈必人  
賜瑯邪之粟但令仁捐樵華亦已家分太液之  
波越稽古失以况今恩唐寓之爲亂江左猶聞  
鈎考塘丁袁晁起而陷浙東未見寬弛白著河  
北橫而進獻之途開方臘平而經總之錢立此  
皆因亂而增科譬猶解醒而飲酒未有責已於  
無罪之時施恩於多事之日如皇上者也臣等  
家非卜式可以輪邊筆異敬輿爲能草詔恭誦  
高皇帝養民種樹之言作萬年之雨露敬述  
皇帝虛名重困之論乃昭代之著龜德意載揚  
神謨爲烈雖正賦未蠲如先河而後海天施必  
被無黃放而白收伏願去文具而達聰明隆孝  
德而大恭儉書良吏於屏風則蒼鷹化而爲馴  
雉驅游民於南畝則刀劍易而爲耒耨將見黑  
龍自斬青丘息兵魚支烏劍窮東海以輸琛靈  
蕪神香隨西王而致琯矣



擬進十三經註疏表

華亭 周立勳 勒白

伏以造昧自天合雜紀陰陽之策敷文在夏連  
山開忠質之符徧雨氣於千巖潤河源於萬里  
作者與述者而並聖經焉得緯焉而益明義洽  
儒林歡騰朝彥臣等誠惶誠恐稽首頓首竊惟  
載籍極博必考信於六經書契繁興遂鉤沉乎  
七緯易之存以卜筮京驗爲精書之斷自典墳  
孔藏不壞齊魯燕趙毛詩最後於學宮鄉國邦  
朝戴禮獨裁夫封禪命端門而制義口立三家



卜豫卦以成文時更九月鹿充惟傳論語虎賁  
俱習孝經孟義宏深姬訓爾雅咸如列宿繼日  
月而爲光有類連珠綴琳琅而耀采五惟去樂  
講同異者四十四門九本系圖次授受者五十  
二種典文殘落猶懷嫉妬之心辭理碎繁莫重  
簡叅之職蕩詩書於煙燼不獨秦灰習禮器爲  
奉常僅因漢蕞自傳記之官不立而圖書之使  
空聞帷蓋膝囊悉資秘本稷勑蒲博安用新書  
未有增損得宜較定無勞於石寫正訛罔軼通

施有賴於板鋟如今日者也茲蓋伏遇皇帝陛下  
英略天授睿慮神謀挹已銘言王杖通乎三  
老虛懷論難漆經辨於九師行大射而朝辟雍  
南通向日奏升歌而覲清廟東被無龍時御平  
臺延訪進群工之對光分甲帳編摩勤乙夜之  
觀考外史於周家徒聞丘索覽遺文於魯國僅  
見春秋幸微言不絕於明時懼脫簡有乖夫正  
義故鐫訛序缺類燕雀之表啁噍而睹本識末  
如犀象之眈牙角念黃帝之置四史讀者無稱



閑白首而竊一經因之就寡不遺小學陋彼縹  
囊止盛綠題特號衆文賢於赤軸先編條例今  
之曰經曰傳本沿虞夏商周雖復爲疏爲箋義  
採王何服鄭煥譜圖於龍馬學禪聖明辦形畫  
於豕魚識開愚昧別其味者等爲楂梨橘柚考  
其音者同於琴瑟笙簧豈有南約而北深惟願  
大成而小志續成正副不煩麻紙五千購及公  
私何假墨丸三百黃白本分於宋代蠹敗必防  
紅緝軸別於隋時猥雜得正帝王燦如指掌衡

石何人聖賢對若同堂操戈誰氏仰塵睿覽俯  
察愚忠定爲制治之書懸諸不刊之典臣等少  
冒抄掇長未博綜邈矣風流顛躓章句之內凋  
哉藝業驅馳翰藻之間鳥篆何能便加引召禽  
經未解卽與詮疏雕瓠質而飾笙簧歡入耳派  
潢流而納海漸學朝宗篇卷瞭然儷琬碑而無  
媿紀綱秩矣當金簡以何慙伏願舉季冬之書  
間以三席習元日之射撻伐四夷慮發淵泉國  
老獻皤皤之頌化隆庠序學徒通濟濟之風緒



餘以理國家學古則獲根本先求禮樂治定乃  
成豈止部帙紛紜因逃五厄縉紳和雅惟誦千  
言而已哉

擬上命錄故都督戚繼光後裔謝表

華亭 徐孚遠 聞公

伏以明主昭國信觸敝帷而必思王者勸臣忠  
在遺簪其可念立後重於表墓周室以是告成  
存亡大於救災魯史書其盛節白鳩集闕國占  
食舊之祥雙虹飲庭家著紹封之瑞有慙傾日  
徒佇景風臣某誠惶誠恐稽首頓首上言竊惟  
熊鬻事周勤勞報於後嗣黔彭佐漢支庶食其  
先勲魏祖表共事於郭嘉言則三嘆宋武推故



恩於劉穆自然涕流蓋契濶之情既深故追崇之典斯稱若乃錄故將之後處以深宮卹亡者之孤人得衣錦長陵一望祀中牢者二家元康大封推絕系者百國收已棄之馬固已感於仁人鳴失旦之雞亦以勸夫死事自主恩易替等於逝波而家慶難長同於棲草驃騎冢象祁連難續子侯之殄祀營平身入圖畫不救中郎之漏言勲業如王撫軍而二孫竟爲廢族忠勤若陶太尉而諸子便同孤根顯達之兒携隱囊而不免敬則之子彈焦尾而獲嫌此皆盡節於衰朝不無孤露之懼有若效誠於隆世必致纂錄之恩茲蓋伏遇皇帝陛下德際欽文功參下武得日月之圭於深谷重見光華加七百之算於此年方成仁壽固已太公爲上相開門而受百神之名風后殞下台法斗而別四方之位然猶當食而嘆用思爪牙之臣按牒以求有懷羆虎之士策追風於萬里不廢涓人之金服湛盧者三千尚憶王髦之劄謂先臣繼光者武步專闡



著績三朝兵策深長有魯子敬之意氣軍營整  
肅得吳司馬之功名早歲江南號樓船於漢世  
晚年薊北作玉壘於秦關卧王羆於華州敵人  
憚其當道徙李廣於上郡天下以爲少雙屬子  
孟之負展朝廷無事當呼韓之款塞邊鄙晏然  
義成絕倫之奇不與於西域平樂持節之勇未  
試於樓蘭加以朝議參差多右李而左戚至公  
寂寞每後薊而先遼故乃獨滿河山嘆檀憑之  
無相空傳威信似慶忌之不侯然而子孝置科  
諸將案以從事仁愿築壘後人奉爲成規此則  
穰苴數篇便當列於司馬之法思政善守更得  
留爲孝寬之功陛下所以當小醜之匪茹念先  
臣之往烈也但先臣素不治生歿身僅有弓劍  
家無餘物子孫粗足農桑訟鄧艾之遺勲已無  
部曲表奉世之奇績安望後人楚錄叔孫必賴  
優人之抵掌吳收周胤亦資諸葛之進言豈意  
興雲自天不待四岳渥鱗絕澗無俟三江蓋以  
望諸之孫在漢有華成之號謝玄之後於宋獲



康樂之封彼姝代其猶然况聖朝而不錄是以  
如天之慶謬及於臣臣某生本良家身無力用  
馬服之書粗能上口斛律之射方嘆世衰徒以  
王公之孫遂竊名於關右未如辛氏之子得著  
節於西州何幸負販之餘乃有纓簪之寵彼焚  
林而求介子空築思煙之臺鑄像而事陶朱徒  
表會稽之望斯恩之重未卜捐糜此澤之深有  
何報稱伏願記功忘過錄瑜掩瑕嘆良弼於當  
年此後豈無方召思猛士於曩日於今亦有韓  
彭冠距既成卽有文章之狀羽翮已具非徒腹  
背之能行見集雀降鳳之臣駢羅於郡國落鵬  
射虎之將蜂起於疆場斯則平露生庭噐車出  
谷矣



今  
方  
邊





